

Uunga siunnersuut: Ilinniagaqarnersiutit pillugit Inatsisartut inatsisissaat
(Ilinniartitaanermut, Ilisimatusarnermullu Naalakkersuisoq)**Saqqummiussassatut allakkiaq****Siullermeerinnineq**

Naalakkersuisut sinnerlugit matumuuna Ilinniagaqarnersiutit pillugit Inatsisartut inatsisissaattut siunnersuut saqqummiutissavara.

Ukiuni kingullerni ilinniartitaanermut suliniarnerup sammineqarnerujussua misilittakkallu 2004-mi pineqartumi inatsisip atuuttup akuerineqarneraniilli misilittagarineqalersimasut tunuliaqutaralugit ullutsinnut naleqqunnerusumik ilinniagaqarnersiutit pillugit inatsisiliornissaq inatsisissatut siunnersuummi pingaarnertut siunertarineqarpoq.

Ilinniartitaanermut suliniarnerup inuiaqatigiinnik kalaaliusunik ineriartortitsinermut tunngatillugu qitiusumik inissisimanerata kingunerisaanik Inatsisartut ilinniagaqarnersiutit pillugit tunngaviusumik malittarisassiornermut peqataatinneqarnerunissaat pingaaruteqartutut isigineqarpoq, assersuutigalugu ilinniartitaanernut ilinniagaqarnersiutisiaqaataasussanut piumasaqaasiornermut tunngatillugu. Taakkunani nunatsinni inuiaqatigiit pisariaqartitaat naapertorlugit piumasarineqartut tunngaviginerullugit ilinniagaqarnersiuteqartitseriaaseqarnissamut tunngavissiinissamik kissaateqarneq aallaavigineqarpoq, taamatullu aamma siunnersuusiorneq inuiaqatigiit allanngoriartorneranni unammisassanik, taakkununga ilanngullugit ilinniartitaanermut suliniarnermut piumasaqaatit inuussutissarsiutinit nutaaneersut annertuumillu suliaqartarnerneersut naammassiniarlugit periarfissanik tunngaveqarluni. Tamatumunnga nangitsissutitut siunnersuutip nassataraa ilinniagaqarnersiutit pillugit tunngaviusumik malittarisassat arlallit maanna allaffissornikkut malittarisassaqaartitsiviunatik Inatsisartunit aalajangersarneqartalernissaat siunnersuutigineqarpoq.

Tamatuma saniatigut kalaallit ilinniagaqartut danskisut SU-sisartut Namminersorlutik Oqartussat ilinniagaqarnersiutit pillugit malittarisassaannik naammassinnikkunik ukiumoortumik akiliunneqarlutik angalasinnaatitaanissaat pillugu Inatsisartut 2011-mut aningaasanut inatsimmi aalajangiinerat siunnersuummi pingaartinneqarpoq.

Kiisalu ilisimatitsissutigineqassaaq siunnersuusiornermut atatillugu oqaatsinik pikkorissarnermut tunngatillugu oqaluuserisassap UKA 2010/68-ip inatsimmi allami attuumassuteqarnerusumiitinneqarnissaa naapertuunnerpaasorineqarmat, tamatumalu efterskoleqarneq pillugu inatsisartut inatsisaata allanngorneratigut pitinneqarnissaa naatsorsuutigineqarpoq.

Tamatumunnga peqatigitillugu siunnersuutip nassataraa ilinniagaqarnermut akiitsunik taarsersuinermit tapiissuteqartarneq pillugu malittarisassat maanna inatsisini marluujunnaarsillugit ilinniagaqarnersiutit pillugit inatsimmut ilanngunneqarnerat. Tamanna ilinniagaqarnermut akiitsunik taarsersuisarnermut tapiissuteqartarneq pillugu malittarisassat ilinniagaqarnersiutit pillugit malittarisassanut attuumassuteqarnerannik pissuteqarpoq. Kiisalu akiitsut taakku ilinniagaqarnersiutisiaqarnerup ilinniarnermi tapiissutitut tunniunneqartup kingunerivai.

Tamatuma saniatigut ilisimatitsissutigineqassaaq tamanna pillugu Inatsisartut Inatsisaannik Nalilersuisarfiup piumasaqaataa tunngavigalugu ilinniagaqarnersiutit annertussusaat siunissami Inatsisartut aningaasanut inatsisaatigut aalajangiunneqarani aallaffissornikkut Naalakkersuisunit aalajangiunneqartalissammat.

Kiisalu ilinniagaqarnersiutit pillugit malittarisassanik atuuttunik aqutsineq tunuliaqutaralugu pisariaqarsorineqartunik nutaanik aalajangersaanikkut, erseqqissaanikkut allannguinnikkullu maanna ilinniagaqarnersiutit pillugit malittarisassat nalinginnaasumik nutarterneqarnissaat siunnersuummi qularnaarniarneqarpoq.

Taamatut oqaaseqarlunga siunnersuut Inatsisartunut akuersaartumik suliassanngortippara.